

INUIT ATAQATIGIIT

INATSISARTUNI



FM2016/96
Mimi Karlsen
23. maj 2016

Tarnikkut nappaateqartut ikiorneqarusunngitsut imaluunniit nappaatiminnik paasinninngitsut tungaasigut tarnimikkut nappaateqartut, peqqinnissaqarfiup kommunillu akornanni attaveqatigiinnerit naalakkersuinikkut sukaterniarlugit qanoq ililluta pitsanngorsaasinnaavugut?

(Inatsisartunut ilaasortaq Agathe Fontain, Inuit Ataqatigiit)

Inuit Ataqatigiit Agathe Fontain qutsavigiumavaat tarnikkut nappaateqartut ikiorneqarusunngitsut peqqinnissaqarfiup kommunillu akornanni attaveqatigiinnernik pitsanngorsaasinnaanermik oqallisiginninniarmat.

Inuit Ataqatigiit pingaartilluinnarpaat kinaluunniit innuttaasoq pisinnaatitaaffeqarmat nammineq inuunerminut oqartussaalluni aalajangiisinnaallunilu. Kisiannili aamma nalunngilarput innuttaaqateqarluta ilaanneeriarluta immikkut paaqqutarisarialinnik, killilimmik nammineersinnaasunik, ilaatigullu imminnut allanulluunniit navianartorsiortitseqqunagit akisussaaffimmik arsaarallartariaqakkatsinnik.

Uanilu inuup napparsimasup illersornissaa pingaartinneqarnerpaajusariaqarpoq. Tarnimikkut nappaateqarlutik innarluutillit arlaqarput napparsimaveqarfimmit, tapersersortinit allaniillu susasaqartunit ikiorneqartariaqartarput.

Tarnimigut napparsimasup pisariaqartippai tapersersorti kommunimit atorfeqartitaq, napparsimavimmit nakorsaaserisoq ajornanngippallu ilaqutaasut. Pingaaruteqarporli napparsimasoq qitiusuusoq puigorneqassanngimmat.

Napparsimasup sullissisuisalu imminnut paaseqatigiilluinnarnissaat pingaaruteqarpoq. Napparsimasup ulluinaasa takorlooruminartuunissaat, piumasaqaatit ersarissuunissaat tamanit ersaritsissallugu pisariaqarpoq.

Napparsimasup aalajaatumik, takorlooruminartumik pilersaaruserluakkamillu inuuneqarnissaa sullissisuinit pilersinneqartariaqarpoq.

Sullissisut, kommunimit tapersersuisut nappaammut ilinniarsimasuunngikkunik ilisimasaqartariaqarput. Naallakkersuisullu akissuteqaatiminni taavaat peqqissutsimik ilinniarfimmi ilinniarsinnaanissamik periarfissaqalersoq, tamannalu qujanarpoq. Ilinniarsinnaanngitsut illoqarfigisaannut tikillugit pikkorissakulaarneqartariaqarput, tamannalu piviusunngortinneqartariaqarpoq. Tassami tapersersuisut ilarpasui tassaasinnaasarpur suliffissaaleqisut sulilertitaasimasut. Taamaammat napparsimasut iluamik sullinneqassappata ilinniarsimannngitsut pikkorissartuartariaqarput.

Napparsimasut arlalippasuit sunngiffimmi sammisaqarnissaminnut kaammattortuartariaqarput. Taamaapputtaaq tarnimikkut napparsimasut inooqataasinnaanermut akornuteqalertarput taamalu sunngiffimmi sammisanut peqataanngitsoortarlutik.

Inuit Ataqatigiinni isumaqarpugut napparsimasut sunngiffimmik peqqinnartumik aqutissiuunneqarnermikkut allatuulli inuuneq peqqinnerusoq atorsinnaagaat.

Assersuutigalugu sunngiffimmi atuartinneqarnikkut, sunngiffimmi timersortinneqarnikkut imaluunniit allatut aaqqissukkamik sammisaqartinneqarnerup inuunermik immiineratigut

pitsaasunik alloriartitsisinnaasoq. Sunngiffimmik aaqqissuutamik sammisaqalernikkut qanoq nappaatip innera avatangiisiniit malussajaarfiunerussiaq.

Innarluutilinnik suliaqartut aaqqissorluakkamik sulisariaqarput. Tamannalu ilinniartitaanikkut pikkorissarnikkulluunniit anguneqartariaqarpoq.

Sullissisut aaqqissuussillaqqinnerusariaqarput napparsimasut ajunnginnerannik, imaluunniit qanoq innerannik paasiniaasassallutik. Suleqatigiilluarnikkut kikkut qanoq innersut arajutsinaveersaartassavaat.

Kikkut napparsimasut sumi najugaqarnersut, sumukarajuttarnersullu arajutsinaveersaartassavaat.

Napparsimaveqarfimmut, politeqarfimmut allanullu susassaqtunut attaveqarasuarsinnaassapput.

Aammattaaq alaatsinannermikkut napparsimasut qanoq innersut maluginiarluartassavaat. Inunnik assigiinngitsunik suleqataasinnaasunik, malussarniarsinnaasunik suleqatissarsiullaqqissapput.

Siornaangorpoq Maniitsumi suleriaaseq tamanut atuutitinnissaa piukkunnarpoq. Tassa akuttunngitsunik napparsimasooq peqatigalugu napparsimaveqarfimmiit, politeqarfimmiit, nakkutilliisut ilaqutaasullu naapeqatigiitarnissaat. Naapeqatigiinnermi pissutsit qanoq inneri, kinalu sussanersut aaqqissorneqarsinnaassapput.

Tassa Inuit Ataqatigiit Tarnikkut nappaateqartut ikiorneqarusunngitsut imaluunniit nappaatiminnik paasinninngitsut tungaasigut tarnimikkut nappaateqartut, peqqinnissaqarfiup kommunillu akornanni attaveqatigiinnerit naalakkersuinikkut sukatarniarlugit iliuusissatut siunnersuutaat ukuupput:

- Napparsimasunik sullissisut ilinniartillugit, ilinniagaqanngitsullu pikkorissarlugit.
- Napparsimasut assigiinngitsunik aaqqissukkanik ornittagaqartillugit.
- Napparsimasunik sullissinerit najugaqarfikkaartumik aaqqissorluarlugit
- Napparsimasut sullissisullu peqatigalugit akuttunngitsumik naapititsisarlutik.

Naalakkersuisut assigiinngitsuni suleqataassapput, ingammik sullissisunik pikkorissaajuarnissaq, sakkussanik tunioraajuarnissaq aaqqissussavaat. Najugaqarfiit pitsaassusissaat isumagissavaat, aammalu innarluutillit ornittagaannik pilersitsissapput.

Inuit Ataqatigiit taamatut oqallinnermut siunnersuuteqarluta oqallinnissarput qilanaaraarput.